

四庫全書

集部

欽定四庫全書

集部

五百家播芳大全文粹卷八十五

詳校官侍郎<sub>臣</sub>劉躍雲

助教<sub>臣</sub>常循覆勘

總校官編修<sub>臣</sub>王燕緒

校對官中書<sub>臣</sub>范 鏊

謄錄監生<sub>臣</sub>莫與儔

欽定四庫全書

五百家播芳大全文粹卷八十五

宋 魏齊賢

葉芬同輯

祝文

祈雨 謝雨 祈晴 謝晴 祈雪 謝雪 蝗蟲

祈雨禱后土祝文

土爰稼穡神之功也今苗皆在田而旱魃為虐苟置不問則

士失其職於神之功母乃替乎惟厚德載物山峙川流使  
雲蒸於山龍躍於川曾不崇朝澤被南畝神之辨此易若  
反掌庸忍坐視而自棄其功於垂成之際哉幸神鑒茲亟  
揚乃職無俾枯槁為神之羞若令與民其敢忘報尚饗

諸廟禱雨祝文

趙德莊

某聞之趨事之時之謂知遂物之成之謂仁今吾邑之  
田粒者穎然而秀者茂然矣神之膏之膚寸之潤漏刻  
之功也若夫桔槔之時既絕焉粒者將失其穎秀者將

失其茂汪且濊者將即於枯神之知仁其必不然故  
敢以告尚享

祈雨祝文

維此之歲以屆暮春時澤未洽麥苗既槁穀種不入將  
成荒災是用恐懼奔走以告惟神之仁哀此下民沛以  
甘雨雷動風行周溥沾足以開有年敢不敬恭克承休  
德

祈雨祝文

黃魯直

維吉日丙寅奔走丞佐以歲事謁於廟庭零雨其濛為  
惠未遍越戊辰寔用不寧身率羣吏靡神不宗過蒙明  
神降鑒勤瘁忘長吏之罪而大庇民隕雨禾田之交畎  
澮皆盈旱苗蘓醒民有慶色傳相告語寔神之雷風與  
民成功澤則優渥乃己巳庚午天高日融四無雲陰雖  
蟻集于丘魚噉於淵膏雨祁祁殆不可復愚民冒陂池  
之澤至於昆弟以鋤耰相逐雖風俗之不美吏化之未  
加抑亦有以使然惟神血食此邦分風之柄呼吸晦冥

足以解紛善歲捐神所易成吏所難是用慘怛三請神  
其終賜之俾民知神之光烈威神永有依歸及其牲牷  
肥大酒醴醇甘將教民美西成之報焉

祈雨祝文

今歲雨暘時節既登麥而美禾迺五月辛巳汔於今不  
雨以風粒者將不得堅粟苗者將不得遂蕃庠牛而耕  
汗背而耘者將不得食將無以奉輸貢賦供給祭祀官  
吏且失其職故以吉日丙寅夙夜駿奔並告於爾神蒙

神之休咎以膏雨而漏下不能三刻星斗晏然使人視  
四郊之枯槁色固自如鄙諺有云狐埋之而狐搯之是  
以無成功者春夏之交神賜厚矣豈於幾成而敗之神  
聰明正直其忍不終惠民吏職不虔獄訟之不得其情  
使之或奪其時吏則有罪神降災于厥躬勿俾民病

祈雨祝文

黃魯直

晚稻既苗植禾將粒雲物下雨西南其風高田塵埃下  
田龜坼歲且無入奈何斯民維爾有神庇民以食能出



雲雨化灾為穰吏將率民泰牲醑酒以報靈德豈不休哉

祈雨祝文

迄冬徂春雨不時至麥苗枯槁人畏疵癘甘澤不降恐餉餽中都稼穡是憂神食依人神爵訓帝享帝利人寔賴于雲雨神所周麾吏以病告神其聽之

祈雨祝文

道成善貸有感則通鈞播不私每求皆獲輒伸民懇仰

瀆聖聰伏念恒暘為苗逾月不雨陂塘已竭苗稼將枯  
顧歲事之可虞寔民命之所寄徧祈羣望未獲優霑恭  
惟僊馭之登天茲為故里廼睠僊遊之邃宇專庇斯民  
是用投誠敢祈善應伏願弭消旱魃呼召雲師霈以甘  
霖變此豐歲

祈雨祝文

竹隱畸士

天地好生豈欲致水旱之沴郡縣失職不能感陰陽之  
和嗟歷歲以薦饑又中春而不雨麥且盡稿民寔何辜

伏願默鑒誠忱大興惻怛假茲一勺之水賜以霽霽俾  
我千里之民脫於餓殍

祈雨祝文

神之食於茲土久矣閭里細民欽神之威時節奉祀惟  
恐不及非神之靈響有以陰中其心則何以得此聲於  
河間之壤哉然而守土之吏未獲展犧牲司勲之府未  
獲議封爵意者神之功德將有待而顯與今河間之境  
踰時不雨農夫閔閔莫保其命山川百神之祀無不謁

也而未獲膏潤之答神不於此日發其威靈以取寵於  
朝廷則後而失其時矣謹謁祠下恭為三日之約誠能  
沛然作為雨澤滌去旱暵則吏雖踈賤敢不條具功狀  
以聞於朝當求爵命以彰神之功此神一舉手湏臾之  
勞而千萬年血食不朽之烈也神亦有意於吏之言乎  
再拜俯伏以俟威命

祈雨祭靈星祝文

自春不雨以達於夏麥且盡死民將無所得食吏愚不

敏以不獲媚於上下夙夜惶懼靡神不宗吁嗟而求曾  
莫我聽夫人凜凜憂在溝壑咸以神之威靈諗於守吏  
曰疇昔閔雨無請弗獲今茲之患匪神孰依謹涓吉辰  
謁款祠下伏願急民之病憇一方之窮黎潤澤此枯槁  
庶幾神不愧於民民有託於神吏於其間得承其流凡  
犧牲幣帛所以奉事神者其敢有愛

祈雨祝文

吏無善政以裕於民幸歲之豐可以一飽今冬雪既乾

而春澤未降苗不出隴農以大恐吏則有罪民寔何辜  
是用潔齋禱於祠下神之愛民甚矣豈不惻然而念之  
乎

祈雨祝文

火耕水耨竭人力以無遺爍石流金當驕陽之可畏於  
茲不雨大懼無年靡所瞻依莫知控告是用恭欵琳宮  
之閔肅陳仙衛之嚴仰叩紫庭跪敷丹懇伏惟至神無  
間密化難名翕闢兩儀幹旋四氣雷驚電擊驅八部之

天龍霧集雲飛會五方之嶽帝沛然一雨遍灑八紘

祈雨祝文

自夏徂秋亢陽可畏維民與吏粒食是憂仰惟諸神陰  
相下土盡起乖龍之蟄大誅旱魃之妖雨以潤之既答  
三農之望物其有矣將觀百室之盈

謝雨祝文

汪彥章

比因旱暵仰叩洪私果遂感通沛然甘澤田疇充足禾  
稼甫成刈穫及時正須杲日浸淫不已適害農工是漑

丹誠再禱祠宇頑雲一掃積潦頓收慰彼三農助成樂  
歲神靈如在報其不忘

謝雨祝文

惟神聰明正直依人而行咳唾雲雷散施膏澤秋成不  
日疵癘潛消稼穡豐登公私並濟吏寬其責神亦何羞  
倘神有靈烏敢忘報

謝雨祝文

秋成在望時雨愆期仰叩靈祠果蒙敷佑雲車風馬即



日感通一夕霽霓三農胥慶茲陳報禮用答鴻私冀克  
豐登以終神賜

謝雨祝文

晴方決日已報旱乾雨不崇朝遂獲霑足枯苗復起宿  
麥滋生如茨如梁將見曾孫之稼寔堅寔好嗣興后稷  
之功歲乃有秋吏獲無罪肆陳薄奠仰答神休

奉詔北嶽謝雨祝文

粵惟冀方歷春不雨天子閔仁元元先事悼懼勅以牲

幣致虔靈岳詔音未敷澤已霑霈帝用嘉粟日勤不忘  
申命守臣拜賜廡下今茲蠶則屢起麥方及秋尚繫垂  
休錫以終惠敢緣報告重輸悃誠

謝雨祝文

甚至郡未及暖席政之無良遽以旱告歎未及謁雨乃  
驟至是神之深閔於民而曲赦吏之罪也敢不告蠲以  
拜靈貺

謝雨祝文

維令不德尚未引去以興旱暵之災維神有靈不賜罪  
誅以加膏澤之惠蔚晚禾而立穎粲植稻以作花飫飽  
決然可期稠載於茲虔卜式符民願以蓋吏愆豈人能  
為悉神之貺

謝雨祝文

惟大荒落陽氣浸驕沮傷天和怒風鳴條川池既耗土  
山亦焦念土之毛民慘不聊祇奉明命爰率我僚禱雨  
於神惠此東臯日走祠下莫敢告勞神享其誠精寢宜

交油然作雲遂不崇朝其散如絲其沃如膏焦卷一變  
蔚為美苗罷遣兒曹無復叫號巫覡反室藏緘鼓簫秋  
成可期玉燭遂調尊有旨酒豆有嘉肴拜貺於神神鑒  
其昭

賽雨祝文

王元之

維年月日具官某謹以清酌庶羞之奠賽謝於豐山漢  
高皇帝之神越自徂暑愆闕時雨下民望歲罔知所訴  
長吏憂人靡敢寧處躬涉崇山祇謁靈宇植笏拜起跪

奠酒脯物薄誠至冀神聽許巫約雨日或五或七曾未  
三夕霽霓流溢泛灑四境鼓舞萬室早稼芄芃凌波而  
出豆麻菜葉無不繁寔致是豐稔實繫陰隲有感則通  
時神之功無德不報惟祀之豐酒肴清肥尸祝寅恭肅  
雍秘殿以答神聰伏惟尚享

謝雨祝文

竹隱畸士

二十四風已窮春序三十六雨不應豐年乃訪山椒爰  
瞻梵宇窅然巖竇中有龍湫俯挹清泠纔乞一杯之水

遂蒙霽潤普霑萬室之田顧茲黎庶之生成出威神之  
賜

謝雨祝文

宋子京

向者甘澍愆澤孽羽為灾浸害甫田參秉炎火涼德自  
咎斯農何辜亟請百神徼丐餘祉聰直垂諒蠹賊既消  
協氣生還嘉生紛集曾如是答居不敢忘欽薦治馨祇  
謝神貺

謝雨祝文

竹隱畸士

火化獨行憫旱苗之就槁熱淫所勝及晚秀以將枯日  
聞雷響之車僅引蛇行之水其如大地安得普沾是用  
訪境內之山川得雲間之洞壑深窮窅窕一挹清冷幢  
蓋初來擁寶瓶於中道風雲隨至灑靈雨於四方曾靡  
崇朝遂踰信宿澤及千里歡動羣情故遣某官遠奉腥  
泉復還龍室肅陳牢醴少答威神

謝雨祝文

趙德莊

雲同霰集若雪而雨南土之常也風雲相持乍離乍合

陰不勝陽也破屯為解以興嗣歲神降之祥也奮雷乘之有干時令吏治之無良也懷神之惠畏神之威不敢自強也維春之祺賴神無窮薦此椒漿也

謝雨祝文

張敬夫

某近以農夫望歲有請於神蒙神降休沛為甘澤浹洽周遍一稔有期更惟神惠終以幸賜吏當虔恭益思不懈以承靈貺

堯山灘江自降休下云  
應不旋踵沛澤周洽

謝雨祝文

竹隱畸士



麥槁於野而神澤之民閔於歲而神惻之吏尸厥官神則釋之黍稷非馨神其格之

謝雨祝文

吏失其職以為神憂不誅其瀆終賜之雨令槁者既蘓勾者畢達是神之有大惠於斯人也倘五六月至於旬時繼之以霧霰益之以霖霖則千里之民真再生矣既拜神貺敢私布之

謝雨送水祝文

乃者吏以不勝任之故不遠百里躬請命於祠下薦獻之際震於神物登水於堂雨乃驟至然未及渥也曾不旬日繼以沛然吏民歡呼歌訟神德謹擇元日納水潭中甘澤之零尚願有嗣則民獲再生之福而神亦有無窮之間

謝雨祝文

張敬夫

涉春以來時澤未應深虞農事之艱奔走控告神答如響雷行雨沛連日未已民得以服事南畝吏得以少寬百

憂神之賜其何以報雖然苗既蒔矣將秀之既秀矣將實之實而堅護而周始得以徧充吾民之腹而克應公上之湏然則自今已往歷夏及秋雨暘之節各適其可無或少愆而後吏之責塞不致數瀆於神某寔惴惴焉惟民之凋瘵方歲之豐猶或不舒惟神之聰明其所臨享寔依乎民吏或有罪願止罰於身而無貽於民也

謝雨祝文

張敬夫

近以時澤未應控告於神惟神哀民之生賜以甘雨俾

金匱要略卷八十五  
克舉趾於南畝為惠曷勝惟是自此以往農事日興所  
望雨澤相繼仍迄開於有年惟神幸賜之以不倦惟吏  
恪承之弗敢怠惟民欣戴之何有極

謝雨祝文

近以時雨有愆祈請于神蒙神降休應以甘澤尚祈終  
賜俾遂有秋敢不殫誠仰祈神惠

謝雨祝文

某近以雨澤未溥薦有控告賴神之靈連獲嘉應久燥

之壤悉得就耕謹再拜以謝惟是農事之難自茲以往  
苗而秀秀而實所仰於雨澤大需蓋源源也惟神幸終賜以  
成有年謹再拜以祈

謝雨祈晴祝文

夏至之日某以南畝望雨控告於神賴神之靈應不旋  
踵今既半月沛澤不翅有餘矣而連綿不已陰氣未收  
復懼為下田之苗是用更有請於神望即開霽以終其  
賜夫久晴而乞雨積雨而丐晴其為請誠若無厭者惟

神矜此下民赦吏之瀆而有以俯徇之自今以往願五六日至於旬時雨暘相須無過與不及保我嘉穀以迄於有秋則寔拜神之大惠吏之修省其敢弗虔

謝雨祝文

竹隱畸士

嗟惟此邦歷時不雨禾且盡搗民將疇依神實憂之賜以膏潤是赦吏之罪而大庇於斯民也不腆牢羞肆用昭報

謝雨送龍祝文

許仲啟

歲在涖灘運適亢旱瞻仰雲漢亟覲緇黃禱祈厭禳禾  
決豐荒泥蟠匪蚘蜒蜿蜿鑒茲質言來止梵宇雲氣  
旁午從以風雨定遷淇泉雲氣回旋風雨依然我疆我  
理潤澤豐美禾稼薿薿民靡艱食吏安其職繫神之德  
酒肴醺醺伐鼓揚徽送神來歸石壁崔崔兮澄秋洄洄  
神歸來兮貝闕珠宮翡翠帷兮妃姬嫠嫠迎笑熙兮神  
兮來歸勿遲遲兮

謝雨送聖幡祝文

竹隱畸士

越疆以請益深溝壑之憂赴感而來曾無江漢之隔泛  
灑於及郊之始霽霽於數日之間嘉穀奮張懼心震動  
涓選日辰之吉道迎幡旆之還願矜照於此心長慈悲  
於我衆

祈晴祝文

張敬夫

霖雨連仍勢猶未已深虞浸溢有害秧麥早夜不遑用  
走控告伏惟矜此下民賜以開霽惟神之惠俾克敬承  
吏之不恭敢不脩省



祈晴祝文

維時初冬氣當擎歛迺者癸酉之夕雷電交作陽縱不收繼為霖雨亦既彌旬穀之登場者未暴深虞其積而壞也用走祈於神所冀開霽以成其功導和致順無為民菑敢不敬省人事以答神庥

祈晴祝文

穰民薦飢幸此一稔穀且獲矣雨復病之吏愚無知惟神是謁既賜之食以活矣忍迫諸口而復奪之乎杲杲

出日將引領是望

祈晴祝文

民張頤以望穀之收吏指日以需稅之入今雨不止更與民既知懼矣非神其孰能救之敢用奔走請命祠下毋使豐年之功虧於一簣則神之賜厚矣將何以報之

祈晴祝文

西山居士

大江之西卑薄之域上田高仰下田沮洳三日雨則渴日十日晴則望雨民雖力穡成功則天雨暘之禱屢干

於神惟神廟食歲拯民病今茲闕雨敢以民請寸雲尺澤呼吸之間神實司之以惠斯民

祈晴祝文

竹隱畸士

嘉穀既登又窘陰雨細民失職惟曰怨咨吏有罪以何逃人無辜之可念伏願矜其望歲賜以有年風伯收雲禾不憂於生耳嵎夷出日葵亦幸於傾心

祈晴祝文

汪彥章

吳興下澤水潦是憂禾稼甫成刈獲在望比緣霖雨有

廢農工浸潤為傷民情愁歎承流茲土敢怠懇祈百姓  
困窮伊誰之責用遣僚吏請命靈祠惟神靈德昭然功  
在社稷呼吸之際陰氛頓開收捲風雲散除積潦農夫  
農婦嘆聲相聞賴神之休使民蒙福三牲之薦聊以寓  
誠神其鑒茲以永靈賜

祈晴祝文

竹隱畸士

夏既旱矣所望者秋秋既成矣而病於雨穀既不得以  
畢收麥復不能以時藝貢賦迫於輸入而泥淖妨其道

涂是皆民之憂而神之所宜恤也吏愚無知敢再拜以請

祈晴祝文

秦少游

凡物平為福有餘為禍雖陰陽之大猶不免焉乃季春以來雨霪不止漫溝洫漲川澮麥苗垂敗將弗克有秋是用禱於爾神惟神廟食此土當赫厥靈以福於民亦將有以事神而不敢懈

祈晴祝文

粵自去冬陰氣為沴雪積衰丈逮茲獻歲寒不時歸雪  
又復作道塗梗塞物價翔湧四郊農事茫然無期是用  
奔走乞晴于爾明神惟神廟食茲土宜赫厥靈揮却慘  
鬱屏除翳昏還我大明毋使斯民久罹重困

祈晴祝文

竹隱畸士

三事就緒實惟豐年十月滌場乃作淫雨豈惟霖盛之  
害實懷溝壑之憂天無遠之不聞民雖微而可閔伏望  
矜其力穡賜以時暘苦雨淒風沈潛萬里青天白日徧

滿九垓

祈晴祝文

汪彥章

民命所繫軍食尤先一或阻飢流為盜賊吳興澤國土  
薄水深時暘獨宜他郡莫比自春徂夏苦雨浸淫蠶麥  
粗收耕農告病牧民是職任責其誰用瀝丹誠力祈靈  
宇覬垂哀閔以福斯民即掃頑雲頓收積潦農夫相慶  
指日有秋民既蒙休神亦何愧

祈晴祝文

宿麥甫成暑雨為沴鋤耔告病農心焦然敢瀝丹誠請  
命祠宇願敷明祐以拯斯民埽蕩頑雲收除積潦三農  
奮力百穀順成永賴神司其敢忘報

祈晴祝文

淫雨繼作農工告窮已成漂沒之憂詎免禱祈之瀆惟  
神善應有感必通願埽重陰以貽靈貺卷舒在手少推  
不倦之仁功利及民終遂有年之慶

祈晴祝文

竹隱畸士



維風及雨妨茲東作之功既耕且耘失我大田之望民  
其告病吏亦靡安是用恭叩玉虛仰祈元聖伏願雨師  
雲將回霄極以收威日君月妃麗天衢而垂景神明無  
間民欲潛通

祈晴祝文

天災時行雨雪為虐上憂勞東方爰下赦令施德宥罪  
以當天心復詔守臣致命羣祀神其鑒之有當上意也

謝晴祝文

比緣淫雨有害三農民心焦然伊誰之責是殫誠悃禱  
於神明果遂感通漸獲開霽春蠶在望宿麥甫成奮力  
耕耘蒙福千里用涓吉日少答鴻休尚克有秋以終靈  
賜

謝晴祝文

比因天譴暑雨過期百姓怨咨田廬漂沒寅夕惴恐莫  
敢遑寧徧禱靈祠期於必應果膺神佑憫此下民畧其  
罪愆俾免溝壑密雲暮捲積潦朝除赫日亘天陰氛自

殄農夫農婦奮力相呼愁歎之聲變為和氣涓辰惟吉  
薄祭是羞仰答靈私冀永神賜秋成在望延頸以頌

謝晴祝文

某以憂寄出守此邦三年於茲水旱屢請神不為瀆年  
穀頻登淫雨害農有疇後應敢陳菲薦少答神休冀克  
有秋以終其賜

謝晴祝文

秦少游

間者久陰不解大雪薦作寒氣總至民不聊生於是率

僚屬吏士奔走分告乞晴於神神享其誠答以景貺閉  
陰啟陽變慘為舒清風既發大明遂升一方熙然僅有  
生意吏實不德何以克堪敢憑酒肴以謝神貺

謝晴祝文

竹隱畸士

吏茲不德以為神憂閔旱而得雨愁霖而獲晴其求紛  
然而神終不之責暴之秋陽訖我穡事豈惟吏之幸將  
民與國家實欣賴之謹再拜受賜

謝晴祝文

我田既臧零雨其濛嗟我農夫憂心忡忡穀旦於差薄  
言往愬謂天盖高上帝臨汝杲杲出日有嘒其星獲之  
捭捭我倉既盈薄采其芹於彼行潦神之聽之無德不  
報

謝晴祝文

昔何雨之淫也民何懼之深也今何晴之遽也神何惠  
之普也何穀之穰且多也何農之喜且歌也何祀之芬  
且苾也何吏之齋且栗也神之使我速矣報不敢以不

疾也

謝晴祝文

在谷滿谷地方慶於秋成曰暘而暘天不違於人欲禱  
蓋勤而喜倍恩既厚則感深伏願宏造無私至仁不倦  
時若陰陽之運曲成覆載之勞

謝晴祝文

歲既單矣方深積潦之憂天鑒在茲遽錫時暘之慶雲  
霓解剥禾黍昭蘓既稽首以知恩敢涓辰而拜賜伏願

慈仁遠被覆幬俯臨曲矜懇悃之誠永祚豐穰之福

祈雪祝文

趙德莊

歲久不雨和氣不效比一再雨人以為祥也而某輒以  
雪請豈易然哉以神之神苟曰氣應一噓吸之間耳及  
茲未春猶足以瑞此邦人之望而非吏之能也神勿遲  
之

謝雪祝文

張敬夫

惟邦有社寔司其土闔闢陰陽呼吸風雨民所憑依國

有彛禮凡我命吏敢不敬事茲冬而溫氣或乖忤陽驕  
不收壤燥靡附來牟何貽癘疫是懼奔走以告俯伏偃  
僂先以嚴霜知神意許釀陰連朝雲同天宇粲然雪花  
上下飛舞風無虐號氣有和豫載積載零遠近周溥沴  
氛一空嘉祥來下音戶物意昭蕪土膏沮洳既釋近憂亦  
寬遠慮嗣歲其有兆端已豫何以報神正直是與勿替  
引之神日聽汝俾我大田有富無窶嗚嗚其歌坎坎其  
鼓農夫之誠神所惠顧



謝雪祝文

趙德莊

閩嶺之南率數載乃一雪山川之神蓋難之而某之凡  
何足以請也迺者妄意焉蒙神之靈自戊午至戊辰開  
陰闔陽寒氣乃踵至再雨且三日而四山之雪積如也  
載惟我民以耕以畦無有休息某其敢怠忽以忘神之  
休不腆酒肴何以稱報尚享

謝雪祝文

比以歲既單矣冬澤稍竭靡遑寧居並走羣望孚聞於

神若響若答陰雲渟興雪乃驟至既優既渥以舞以歌  
吏釋其憂敢不拜賜尚願終惠以為神休

蝗蟲祈禱祝文

秦少游

比者善氣始應霖潦屢降溝壑流通事既有望矣而越  
自雨闕以來飛蝗蔽天敢為妖孽土之毛髮所過為盡  
嗚呼其不已也哉大旱之後而得霖雨是天有意於恤  
民也惟爾有神亦當上承天意驅率醜類入於江海自  
求多福毋或違天以速愆咎

蝗蟲謝淨祝文

比以旱氣構沴災螽羣翔方穀之蕃敕來勤捕致禴祠  
典祈稔農秋至誠如答飛孽無災唯類訖息案盛迪嘗  
惟神之貺屆夫多祉匪曰嘉薦聊用謝誠

五百家播芳大全文粹卷八十五

欽定四庫全書

五百家播芳大全文粹卷八十六

宋 魏齊賢

葉 芬同輯

婚書

許方進問親書

黃魯直

誤蒙裏言委貺嘉幣維茲息女近若而人伏承賢弟幾  
先輩武庫五兵名駒千里方卜蘋蘩之助豈伊顛顛之

求屈元禮之高明及阿承之小醜著姓多有顧袁宗之  
眇然懿親不忘維伯氏之故也眷逮如此終辭謂何

回問親書

冠冕同朝素欽材術之美軒裳望族遽辱婚姻之求方  
屬文拘未容賓謁行媒薦至不遺菲薄之微合姓見盟猥辱  
縑紉之厚惟茲弱女行且初笄僅知保傅之嚴未係蘋蘩之  
重伏重賢子某官箕裘志業詩書世家早以門閥之賞延  
已列搢紳之仕藉愧茲扳附竊幸夤緣雖葛藟施於條枚疑

若非對而泉水入於淇澳於義有行無復異詞允膺嘉命  
求婚書

伏念窺管一斑早欽宗黨之美河潤千里竊願婚姻之  
求顧惟卑平寔愧扳附男某早聞詩書逮及有家言采  
蘋蘩猶虛中饋伏承賢弟幾小娘子令德成於保傅善  
聲發於幽閒逮將有行敢議合好雖泉水入於淇澳不耻  
下流而葛藟施於條枚終慚非對謹因媒氏恭聽嘉音

許婚姻書

行媒薦至合姓見求顧弱女之焉依非令人而何俟某  
人中庠序之成式從師友而學文蓋將起家已見立志  
巾櫛侍於慶閥逮及有行蘿蔓附於喬枝不為無託當  
承嘉諭寧復異詞

問親書

恭以唐杜望族江湖世家往昔接諸父之遊雍容非一日  
之雅惟夙期之不淺是婚對之敢求伏惟某人體二南之  
風敦四德之教先兄息某屬當世之重願虛宗婦之宮



輒用行媒用薦嘉禮青蠅附於驥尾非吾偶之可譏女  
蘿施於松枝亢衰宗之為幸期於得請冒貢至情

許蕭氏書

耕隴相依仕途相助方欽門第之美迹辱婚姻之求第  
幾女能櫛縱笄未閑蘋藻伏承第幾齋郎克家能子聞  
禮興詩葛藟施於條枚尚疑非對泉水入於淇澳今則  
有行不獲固辭勉承嘉命

回楊氏定書

某啟名實缺然門地最爾維江湖橘柚之域遠京洛衣冠之遊願嘗同僚辱貺重禮貌是孫女逮茲繼筭第幾齋郎簪笏白於懷綳芝蘭秀於庭戶卜相宗事當求大家猥得附葭莩之親恐未勝灑掃之職申以盟好不遑遲延勉輒拜嘉對越將命

回魏氏書

欽仰風流惟是婚姻之故講修世睦敢申燕婉之求小子字古原遼材不及中學未聞道猥叨命士方且異官惟

節春秋莫助蘋藻伏承賢第三十九娘子教有端緒德  
成幽閒妄聽行媒之傳肯顧鄙宗之陋謹差穀旦恭候  
玉音

回定書

門卑地薄實淺聲浮所通婚姻多出平素賢郎七先輩  
行義修於鄉黨才華秀於士林枝葉從僊李而來闕閱  
有英公之舊家弟之女未閑於教僅若而人豈圖蘋蘩  
之求迺及菲葑之陋伏蒙委以書幣告之話言泉水流

於淇門雖容比義女蘿施於松上實愧攀高不獲終辭  
覲然拜辱

强宗求婚書

孫仲益

罄三請之勤方慚率爾快一日之雅何旣如之茲者伏  
承令孫女屬當擇對之年而某小侄强宗適契有家之  
願命龜獻卜執雁告虔薦食芹之甘靡虞於按劍投斷  
金之利式佇於報瓊

超宗求婚書

孫仲益

賣婚久矣浸已成風傾蓋歡然莫如求舊式佇肥家之  
慶敢忘修贄之恭以某長男早習箕裘粗聞詩禮偶諸  
姑擇婿之日亦外家求婦之時眷言啐啄之同茲益綢  
繆之固抵龜不用投介而行魯衛親自同兄弟朱陳  
世世不替婚姻庶乎相依唇齒之間可以盡索形骸之  
外

伯宗求婚書

孫仲益

手足之情鍾本相求於原隰婚姻之好合茲有望於桑

榆盍申執雁之恭永締施松之託某小侄伯宗者屬在  
諸姑子姓之行而小四甥者寔次外家季孟之間應緣  
而喜之言奚俟三占之吉視崔盧之門戶亦何足道哉  
繫魯衛之兄弟固無間然矣

介宗求婚書

孫仲益

訪故家之劍悼既往之莫追賦束薪之詩庶後來之有  
繼更重綢繆之好盍申燕婉之求伏承令侄女宛如衛  
女之賢問諸姑於淇水而某中子介宗者端若秦姬之

子見舅氏於渭陽固已託葦於葭中更欲施蘿於松上  
故無失故夫復何求新之又新當自今始

表宗求婚書

孫仲益

仰崇墉之數仞寒溫之間缺然締高援於一言宿昔之  
因審矣喜深一老光冒衰宗此者伏承總幹學士令長  
女近代名臣之家本朝循吏之後儒風未泯家法仍存  
以某舍弟尚書第三男表宗讀父書尚勤師範敢聯姻  
姻遂登通德之門屬有姓名已著繫姻之籍

宏宗求婚書

孫仲益

雞豚同社桑梓交陰早締嘉姻更申舊好伏承司理宣  
教第四令女簪纓仕族逢掖儒家俎豆嘗聞蓬蔭自植  
以某尚書舍弟第四男宏宗為農為圃方續父菑學禮  
學詩尚親師範一言作合兩喜成和河鯉之求固慙率  
爾霜鍾之應厥有由然

季益弟女回定色中大書

孫仲益

三星照戶之光已屆婚姻之候九里漸河之潤寔翳勲



闕之高伏承某官一鄉之月旦所推大父之風流未遠而某侄女遂依名族以亢衰宗坦腹踞牀會見出諸郎之右齊眉舉案庶幾事君子之恭

答李氏問親書

孫仲並

風馬殊方相望於萬里金蘭一氣遂合於兩心發幣來臨占龜有兆伏承某官大丞相之後綽有餘風以舍弟女子故將軍之家尚存素履世方亂矣豈無一事之可依天實為之庶幾百年之偕老

答董舍人問親書

北際南垂迥若參辰之次東傾西應自同針芥之投夫  
豈偶然適有天幸伏承某官英妙無窺園之好而某舍  
弟縣丞長女素風猶映雪之餘早緣草木臭味之同不  
改風雨晦明之度佩至言於三復固無磨玷之尤出妙  
句於五噫共有相春之樂

答王氏問親書

紬書延閣早陪鴛鴦之聯竄迹窮閭又玷葭莩之末伏

承某人名駒千里奇產萬金以某舍弟縣丞第二女方從姆傳閑機杼之工莫助尊章薦蘋蘩之祭不謂好述之意俯循代匱之規二姓交歡敢議參軍之配一門推重孰逾阿大之賢

答曾氏問親書

管蒯代匱奚俟齊姜之求芹藻可羞宜効野人之獻伏承某官世曹實江左衣冠之表家聲猶魯國洙泗之餘以某侄女固嘗襲荆布而僚賤貧可以執箕帚而奉灑

掃屬室家之有願式諧鳴鳳之占繫棗脩之告虔遂獲  
乘龍之喜

答張氏問親書

婚姻合好亦已累年情義綢繆始如一日固應求舊豈  
復圖新伏承令嗣主簿挺鸞鵠之姿而尚棲於枳棘以  
某舍弟縣丞幼女襲布荆之素而不廢於薊管發幣孔  
嘉貽書甚寵視崔盧一時之望固已歛然締朱陳二姓  
之歡永為好也

答婚書

闕夫子之牆竊有執鞭之慕掃相君之舍尚懷按劍之疑豈謂諸郎擇對之初不問下走抗塵之賤伏承令嗣學士議論獨守家法文章已有父風遇却鑒之客若無視絡秀之家何有代價可矣奚為食鯉之求何貺如之遂竊乘龍之喜

答婚書

孫仲益

早以父兄獲領俊遊之末晚因童稚又塵姻婭之聯集

盛禮於一門締交期於三世伏承某人衆謂恂恂無子弟之過而某女子自忝兢兢貽父母之罹重勤慶幣之先適契有家之願莫不代匱母廢窮閭管蒯之求可與晤言庶乎東池紵麻之漚

求楊氏婚書

一廬同井密依桑梓之陰百尺干霄迥結絲蘿之託伏承某人汾隅鼻祖號畧名家世緒相承風流如在如某者窮鄉冷族陋巷諸生敢懷河鯉之求式佇澗蘋之采

望塵瞻若雖同楚越千里之遙傾蓋歡然遂結朱陳兩  
家之契

參政侄女回虞守子親書

粉榆同社藐然雞犬之間羔雁旅庭端若駟蛩之應遂  
邀一時之幸永諧兩姓之歡伏承令嗣某官襲父祖箕  
裘而家法具存以某登仕兄幼女奉尊章之槃悅而婦  
儀已習榛栗棗脩之贄以辨男女不敢過焉蘋蘩蕝藻  
之采可羞王公永為好也

余氏答婚書

婚姻之合有初方軫楚弓之念宿昔之因未改舉欣趙璧之歸族黨交歡里閭贊喜伏承某官勲烈名臣之世文章後學之宗眷此春秋鼎盛之時獨見歲寒後凋之操某縣丞第次女復嗣奉匱之薦庶幾舉案之恭薪楚之束綢繆不替青氍之舊琴瑟之鳴和應宜同白首之歸

族妹再適為張承繼繼室答婚書



鄭通德之門在望竊懷附驥之榮傳孝廉之室久虛輒  
備續貂之乏伏承縣丞宣教漢金張之華胄唐燕許之  
故家以某云云官冷枕流門寒映雪烏夜啼而三繞春  
梁木之何依雉朝雊以雙飛屬商絃之屢叩聘婦有如  
孟德曜其亦可哉擇對而得溫太真豈所望者雖重奪  
汎舟之守詎敢忘舉案之恭

答董舍人問親書

孫仲益

通德門四牡之路莫窺墻仞之高平輿淵二龍之鄉幸

金瓶梅詞話卷八十六  
接州閭之末俯膺大貺重以好詞曲敦久要之情永締  
歡盟之固伏承令孫承務名駒千里奇產萬金乃眷女  
孫麤閑姆訓謂婚姻之好莫如魯衛之親而聲氣之同  
奚俟姬姜之貴

答李氏問婚書

書千佛之名夙忝父兄之契合二姓之喜又塵姻婭之  
聯重勤緹綺之臨加賁囊書之寵伏承某人早聞學詩  
禮襲弓冶之傳以某侄女孫可使奉尊章羞蘋藻之薦

乃眷異日游從之好實為一朝附託之因粲然雁幣之  
陳過形於褒袞叢爾棗脩之贄殊異於報瓊

為蔣樞密謝婚書

名位不侔莫奉齒牙之餘潤婚姻有託幸依肺腑之末  
光徒久仰於旌旄尚未瞻於履舄伏念某倦游晚節投  
老餘生回首東隅見桑榆之已逼乞身南畝幸松菊之  
猶存甘從來耜於先疇敢望簪纓之後乘豈謂孫枝之  
弱質遽聯子舍之榮姻恭惟某官望蓋五朝學傾萬古

豐功偉績幾遍人間崇議欵言屢移天意符竹暫分於  
南紀衰衣行慰於東人尚憐范賈之同僚不惜齊鄭之  
非偶抑實先君之假寵豈惟末嗣之叨榮自慙屏迹於  
窮閭殊闕馳箋於紀室鈴齋旅進已難免於哀蹤巖石  
具瞻共俯同於輿頌

與徐太宰求婚書

夫婦有經周禮莫嚴於判合昏姻尚族衛詩偏叙於宗  
親輒忘憑藉之徽仰恃游從之舊某第幾侄某從師有

日授室及時伏承賢侄女第幾小娘子相胄高華姆儀  
閑習章聞名於下執許徽福於先公門第非侔雖培塿  
本無松栢宗祊有慶庶澗溪共採於蘋蘩有少定儀具  
如別錄

代韓尚書孫聘王氏婚書

呂伯恭

講舊游於羣從早接茵憑圖嘉耦於諸孫肇脩幣聘載  
蠲吉旦用展多儀云云官學載初及茲授室伏承云云

德容參幼協此宜家奕奕梁山顧自慚於樂土湯湯淮

水韋將挹於慶源

用韓奕及王家  
事淮水湯湯

二姓之合於禮為

嘉五兩之陳其儀則舊

代叔秀倅回李氏定書

百年門戶各保家聲二姓婚姻共敦先契某位長女順  
承之道肄習未閑伏承某人英妙之稱發聞惟舊既舉  
道言之固敢稽報聘之脩有若靖康以來非無雅素其  
自葉公而下莫不寵嘉

定芮司業女書

合父兄師友之契疇若高門聯婚姻甥舅之親敢異他族問姓名之始在禮有初某緒論與聞曾侍漸摩之舊令女素風不改諒惟淡泊之安永媿諸生自在西河之上尚蘄季女肯來南澗之濱

回潘氏定婚書

游從再世既彼此之具知講肄十年亦往來之無間迨聞嘉命其敢固辭令弟茂才種學之初方求內助某女及笄之始未習婦儀志尚有加可使効饁田之役進脩

或怠猶能獻斷織之規

代先君通曾氏定婚書

蠲豆籩之薦聿脩宗事之嚴躬井臼之勞尚賴素風之  
舊既令龜而叶吉將奠雁以告虔敬致微誠願聞嘉命  
代叔知府回李主簿定婚書

北望中原慨想故家之律度南來江國獲依名勝之風  
流苟可合二姓之歡何必有一日之雅文章議論固已  
不凡某女婉婉聽從粗謹所識有來玉帛之禮式陳捧



栗之儀師友淵源之功知所自矣夫婦倡隨之義將有賴焉

長女適練貢士書

熊子復

藐茲若人儀未閑於蘋藻藉甚游子譽早著於芝蘭既諧鳴鳳之占猥辱雙魚之素仍申厚意詎敢深辭伏念某之長女粗習婦功曷勝于箕帚恭承知縣令侄力傳家學已試於膠庠此因柯斧之媒遂成葭玉之契門墻伊邇寓居雖共於城堙風雨弗渝嘉會定期於京口不

腆回幣具於別箋

次女適王秘讀書

續大家之訓顧息女之未能讀東觀之書羨名郎之有  
立緣會集一言之作戲偶諧和二姓以成歡某次女妙  
恭弱質幽閑第守華門之陋伏承令嗣秘讀妙齡秀發  
早參蓬閣之華猥承致於雁儀豈特稽於鳳卜寮同三  
館雖序齡齒之絕殊宴共一樽尚論文章之相益

回禮書

伏以世傳鼎軸夙仰韋平之門好結絲蘿慙非秦晉之  
匹屢勤敦諭不敢固辭伏惟某人秀發天資美由世濟  
而息女某人維遵姆訓未習婦容辱嘉幣之相先撥寒  
宗而有覲玉臺下聘獲窺溫嶠之風流竹筥遣行第愧  
叔鸞之清素有少薄物具如別牋

回禮書

言念禮本為昏是為萬世之始人惟求舊實交二姓之  
歡薦辱好逑欽承高誼某第幾女含飴鍾愛粗聞女誡

之詞伏承某人第幾男禁鬱稱珍夙謁士林之望襲吉  
占於鳴鳳追妙譽於乘龍嘉命難違欣悰增激

定親書

言念願聽月評稔聞風範辱在美仁之契宜先嘉耦之  
求某第幾男少習義方粗供子職伏承令長女小娘子  
幼閑內則克著婦儀敢因媒妁之詞遂締婚姻之好仰  
遵慈訓欽佇好音

定親書

言念二姓之好蓋重於婚姻四海之人孰非於兄弟惟是贅居之俗出乎霸世之餘然義士罔或非之故流風猶有存者某侄某幼孤自奮結約忘奇幾同蜀客之倦游屢歎馮生之無室伏承令女幽閑秉節孝養騰芳待冀缺以如賓諒諧素志嗣中郎而傳業豈廢初心敢託良媒願聞嘉命

繫臂書

字挾風霜坐愧傳家之術業名知草木夙欽奕世之聲

猷茲實出於夤緣得遂申於盟好恭惟親家將使團練  
令女小娘子早閑姆訓式宜許嫁之剪筭而某侄孫初  
涉儒流行且成人而及冠肆媒斧之得請協占鳳之告  
從感佩之誠敷宣奚罄有少微幣錄在別箋

答求親書

歐陽彥成

雞犬相聞多被親仁之德絲蘿有託敢辭燕婉之求過  
蒙雁幣之勤式叶鳳占之兆仰攀高援卓哉韓樂之邦  
退省寒門曾非齊大之耦敷宣罔既感佩良多

送定書

吳元吉

勤水寒鄉浪繼延陵之禮樂童山名族聿脩常得之公  
忠偶緣冰上人執斧以伐薪默契月下老結繩而繫足  
卜云其吉已叶鳳占禮不可虛用仲燕幣有少儀物具  
載別牋專狀啟聞伏惟照察

送定書

吳元吉

居聯里閑聲華未齒於崔盧勢隔崇卑匹敵敢當於秦  
晉豈意諧占於得鳳遽聞冒慶於乘龍伏承潁川大中

學士令女小娘子承順多儀縞裝已結小侄庭誨雖篤  
姻座未升偶資齊麴之和遂致楚蘿之美諒非素知之  
可取方期辭大以圖安深願夤緣預告休於月老成茲  
嘉會爰有兆於冰人雖曲禮之三千隆於合好須純白  
之五兩用以將誠謹列敷陳殊增悚愧

送定書

歐陽彥成

里閨甚邇雞犬相聞惟聲氣之相同故婚姻之敢議某  
以第幾男某年將踰冠中饋尚虛伏承太厚親家小娘



子姆訓素敦婦儀夙著既荷鳳占之諾用申雁奠之儀  
有篚篚箱委於庭下謹奉狀上聞伏惟昭察

送定書

扮揄甚邇鳴未隔於一牛草木本同饋因通於雙鯉不  
棄綿綿之德願歌灼灼之桃某以某中饋久虛莫偕奉  
禮伏承令女小娘子內則素習宜遂有家謹卜良辰用  
伸言定有少微幣具在別牋

送定書

族系延陵常恨孔門之未振望高潁水每欽虞侯之克  
昌方愧忝於眷間敢希聯於姻契况小男未能用於文  
史而令女已悉喻於訓章豈非小鄭之資獲奉大齊之  
耦二姓合好重諾奚啻於千金六禮內成入幣庸遵於  
五緡式涓穀旦恭致微儀

回定書

太伯封吳淑氣久淪於寂寞混元指李儂源猶襲其芳  
芬合二姓以成親結百年之眷愛恭惟某人長孫學詩

學禮早通六藝之文某季女無非無儀素稔十歲之訓  
既蒙采菲固願依松契彼鳳占卜云其吉粲然雁幣敢  
不拜嘉

請媒書

汪元吉

絲蘿弱質倚喬松而遂高蚊蚋微軀附良驥而能遠不  
愧蓬茅之陋輒攀閭閻之崇伏惟潁川大中學士令姪  
女小娘子夙親姆訓素著德容竊睹椒花之頌詞復覲  
桃源之晏遇念禮行於漢莫重知名而官設於周猶敦

判合尚期金石與結鴛鴦

請媒書

引線因針言聞信史伐柯匪斧永播風人事儻藉於黃  
緣理必資於介紹某以第幾男某方從外傳未卜嘉姻  
伏聞某人第幾小娘子令德中淳婉容外淑早佩閨門  
之訓素閑蘋藻之儀欲結潘楊二姓之歡必假媒妁一  
言之重輒於將命恭俟報音謹啟

請媒書

伐柯須斧引線因針若匪千金之言曷結二姓之好恭  
惟媒氏八安人蕙蘭育質冰雪流芳早歸詩禮之家夙  
擅閨房之秀某小侄某雖逾壯室未克成家伏承某官  
十娘子綽著婦儀夙遵姆訓既四德之兼修諒五長之  
可稱敢以衰宗仰扳高援謹具啟以聞伏惟照察

### 婚書

聚星舊族愧閥閱之已零觀樂名家想風流之尚在輒  
緣鄉里之好得議婚姻之求某以小姪學生某雖詩禮之粗

聞奈蘋蘩之乏助伏承令侄女小娘子婉容外淑懿行  
中純吉既叶於鳳占禮用申於雁奠有少禮幣具於別牋

婚書

居連一舍豈殊桑梓之陰心同二人雅契金蘭之好慶  
夤緣之有自顧欣幸之何多某女素閑姆訓無非無儀  
某男早就師模克岐克嶷正三星未在於戶適愍水肯  
流於淇禮云禮云爰奉絲綸之五綬樂只樂只永堅盟  
誓之百年

婚書

一從攀附既叨鄰燭之分豈料夤緣申以秦婚之好雖  
金蘭之雅重視珠玉以增羞某長孫碌碌無能祇循弓  
冶伏承某官令小娘子喧喧騰譽獨秀閨房辭已籍於  
蹇脩諾况蒙於季布卜云其吉固無俟於抵龜禮不可  
虛曷敢忘於進雁謹奉啟以聞

婚書

標有梅詩人所詠欲男女之及時咸其輔易卦之辭重

剛柔之相感某幾男某學詩學禮粗守師模而令女小  
娘子采藻采蘋夙承姆訓今早聯於親契願遂結於華  
姻媒妁通誠既欽承於重諾金蘭講好庶無負於曩心  
輒有薄儀裁於別幅

婚書

聲名無似已慚曲逆之長貧緣契有開復謂治長之可  
妻重眷絲蘿之結益增瓜葛之榮喜託冰清愧非宅相  
某長孫某年逾志學幸逢繫足之老人伏承令孫小娘



子思妙組文許射畫屏之雀目聯親實舊講好惟新二  
人喜荷於同心兩喜無煩於溢美念信者言之瑞當不  
食言雖禮者幣之將當先納幣用陳菲薄庶表悃悃

婚書

梅花示信嶺頭通交好之誠桐葉題詩樓角記合歡之  
事納采雖由於邂逅牽絲尤屬於夤緣伏承某人夙整  
閨儀詞正工於詠雪某男粗遵庭訓才莫擅於凌雲偶  
逢柯斧之良幸締金蘭之好射雀漫誇於有中委禽竊

愧於無儀未具鑑臺曷追攀於溫嶠難尋玉杵敢希冀  
於雲英深蒙季諾之曲從直指千門而徵貢紅綬既急  
猶嫌上釣之遲青瑣雖遙尚想遺香之近

代姜寺丞回史丞相府定親書 李漢老

相門出相方託身槐棘之陰丞壁負丞敢妄意松蘿之  
附蒙以貴而下賤聘不腆之若人激福甚榮省心知愧  
恭承某官階蘭堪佩足繼史魚之風而某女澗藻可湘  
粗聞姜鯉之教屈禮百僚之重好合二姓之歡君子不

施其親已敬佩魯公之訓公侯必復其始願益綿魏國之封

初婚回書


觀書月下喜聞得婦於幼年折柳門前幸獲問郎於同里况龔黃並高於地望宜朱陳亦締於世姻令男已學吟龍茂著奇童之譽小女喜占鳴鳳愧無幼婦之詞雖嫁娶以長大為期然男女之婚姻貴早荷不棄長干隣近之陋願早諧雲郎年少之期好音速報鳳樓人此正

欽定四庫全書

五百家抄芳大全文粹  
卷八十六

三

嘉靖青春早作蟾宮客當繼前脩



五百家播芳大全文粹卷八十六